

RECEPT ZA USPJEH MAJE MEHMEDOVIĆ

Šta nam je potrebno kako bismo ostvarili svoje ciljeve i bili uspješni? Neko će reći talenat, neko ustrajnost, a neko će reći ljubav. Za Maju Mehmedović na prvom mjestu je rad, a zatim i podrška. Pored navedenoga, tu se nalaze i ustrajnost, samodisciplina, kao i drugi faktori, od kojih je jedan vjerovatno i sreća.

U subotu, 10. juna, na redovnom mjesečnom sastanku stipendisti Fondacije Hastor imali su priliku slušati životnu priču Maje Mehmedović, izvršne direktorice i članice uprave ProCredit banke. Ono što je studentima-stipendistima posebno bilo interesantno je podatak da je i gospođa Mehmedović zapravo „fondacijsko dijete“.

Majin životni put započinje u Sarajevu. Njeno djetinjstvo prekidaju ratna dešavanja na našim prostorima, te zbog toga s roditeljima odlazi u izbjeglištvo u Split, a potom u Njemačku gdje završava srednjoškolsko i fakultetsko obrazovanje. Adaptacija u novom okruženju i jezička barijera predstavljale su ogroman izazov koji je Maja uspješno prevazišla

svakodnevnim višesatnim radom. Naglašava i podršku koju je dobila na tom putu, ne samo od roditelja već i od direktora škole, profesora, a kasnije i od jedne njemačke fondacije. Rad i podrška su dva bitna faktora pomoću kojih je uspjela da završi srednju školu u Njemačkoj kao treći najbolji đak u gimnaziji, da završi dva fakulteta, zaposli se, a usput i da sebe ostvari kao ličnost. Također ističe kako je za razvoj, pored podrške i rada, bitna i kritika, ali samo ona dobronamjerna.



Svaka uspješna osoba ima svoj recept za uspjeh. Stipendisti Fondacije Hastor tokom mjesečnih druženja nerijetko imaju priliku da slušaju inspirativne životne priče uspješnih ljudi, i nakon svake odslušane možemo primijetiti da svi recepti za uspjeh ipak imaju nešto zajedničko. Na našem junskom mjesečnom sastanku naučili smo da uspjeh nikada ne dolazi sam od sebe. Njemu prethodi puno rada, truda, ustrajnosti, a ljubav, podrška i faktor sreće vjetar su u leđa na tom putu.

Naša gošća nas je podsjetila na veliku vrijednost Fondacije Hastor, a tu se može istaći i bogatstvo koje stječemo kroz naša poznanstva. Svakog mjeseca naši stipendisti imaju priliku upoznati nekoga ko živi na udaljenosti od preko 50, 100 ili više kilometara od njega. Ovo je mjesto gdje se stječu prijatelji za život - prijatelji koje, pored sitnica koje nas čine posebnima, povezuje jedna velika nit – Fondacija Hastor.

Sadžida Kosovac



HUMANITARNA IDILA NA TEŠANJSKIM POZORIŠNIM DASKAMA

Učenici trećeg razreda medicinske škole u Tešnju prošlog mjeseca organizovali su humanitarnu večer na kojoj se izvela predstava "Porodična idila" prema scenariju i u režiji našeg stipendiste Adisa Merdića. Humanitarna akcija organizovana je kako bi se prikupila novčana sredstva za učenike Adisovog razreda koji nisu u mogućnosti obezbijediti put na maturalnu ekskurziju u Španiju u nadolazećoj školskoj godini. Na ovoj humanitarnoj večeri skupljeno je oko 1700 KM od čega je 500 KM skupljeno na dan Adisove predstave. Pored Adisa, organizaciju ove večeri potpomogle su i njegove kolege iz razreda.

O odazivu i uspjehu Adis kaže: "Zaista je prijem bio odličan i bile su isključivo riječi hvale za scenarij i našu glumu. Ovo mi je bila prilika da svoju drugu ljubav, ljubav prema drami, iskažem na tešanjskim pozorišnim daskama pred brojnom publikom. Ne mogu vam opisati svoju sreću."

Ovakvim društvenim angažmanom naši stipendisti pokazuju, prije svega, kakvi su ljudi, a djelovanje kakvo je Adisovo, pokazatelj je da naše stipendije idu u prave ruke te da su naši stipendisti ne samo odlični učenici, već društveno odgovorni i aktivni.

Adisu želimo svu sreću u nastavku školovanja i u radu na daskama koje život znače, a nadamo se da ćemo vidjeti još mnogo ovakvih akcija u organizaciji naših sadašnjih, ali i budućih studenata.

Mirza Okić



BIVŠI STIPENDISTI KAO STALNA PODRŠKA FONDACIJE HASTOR

“Poštovanje i povezanost s Fondacijom Hastor ne prolazi podizanjem zadnje stipendije s računa. To je nešto što ostaje u nama, prateći nas cijeli život.”

Samra Bečić i Nermina Imamović bivše su stipendistkinje Fondacije Hastor, rođene i nastanjene u Kalesiji. Činjenica da su još prije skoro tri godine, završetkom studija prestale biti stipendistkinje nije ih spriječila da ostanu važnim dijelom Fondacije Hastor. Naime, Samra i Nermina, iz zahvalnosti prema Fondaciji, odlučile su ostati volonterke Fondacije i na taj način doprinijeti njenom radu. U svojstvu volonterki nastavile su mentorski rad s učenicima-stipendistima Fondacije Hastor na prostoru Kalesije.

“Ostala sam volonter prvenstveno zbog Fondacije, jer svaki stipendista zna da ima oslonac do kraja života. U jednu ruku, to je najmanje što mogu učiniti da se zahvalim za stalnu podršku Fondaciji i da ujedno budem i primjer novijim generacijama”, ističe Samra.

Trenutno najveći dio vremena provode završavajući fakultetski staž, te pripremajući se za nove životne staze. Nermina je diplomirala na Tehnološkom, a Samra na Edukacijsko-rehabilitacijskom fakultetu. Kažu kako kroz volontiranje sa stipendistima ponovno

oživljavaju sebe i dobijaju snagu za dalje. Volonterske sastanke prilagođavaju učenicima onoliko koliko je to u njihovoj mogućnosti. Praktikuju aktivan timski rad na sve teme, kako obavezne, tako i slobodne, zapisivanje vlastitog mišljenja kao i veliki naglasak na poboljšanje prosjeka učenika uz zajednička učenja, vježbe i ponavljanja.

“Tim koji smo imali s njima bio je idealan. One su uvijek bile fine i korektne, izlazile su u susret kad god nam je pomoć bila potrebna. Moje kolegice i mene pripremile su za dalji, samostalni rad, počevši od pisanja izvještaja pa do vođenja jednog od ovakvih volonterskih sastanaka”, kažu učenice čije su volonterke bile Nermina i Samra.

Volontiranje je nešto što se uči kroz iskustvo, ali sve što ostane u nama poslije toga onoliko je koliko smo mi htjeli da uzmemo. Zaista, Fondacija Hastor ima posebnu vezu sa svim svojim stipendistima, a upravo ovo odličje je čini jedinstvenom. Nermina i Samra su samo još jedan dokaz da je obrazovanje izbor pobjednika, tačnije, zahvalnih stipendista, koji bez obzira na svoje životne pobjede ostaju stalna podrška Fondaciji Hastor.

Hanka Mujkić



MUZIČKA PRIČA IZ ŠPANIJE

Ammar Biser, student Muzičke akademije u Sarajevu i stipendista Fondacije Hastor je imao priliku zahvaljujući Erasmus programu provesti ljetni semestar u Španiji i učiti od najboljih.



Redakcija naše fondacije je stupila u kontakt s njim kako bismo u ovom broju prenijeli njegove utiske.

Ammar je student treće godine Muzičke akademije u Sarajevu na Odsjeku za gudačke instrumente i gitaru, a stipendista Fondacije Hastor već devet godina. Željan novog iskustva i znanja aplicira na konkurs Erasmus programa tako što im je poslao videosnimak jedne od svojih izvedbi na gitari nakon čega dobija pozitivan odgovor.

Zahvaljujući Erasmus-u ove godine je imao priliku posjetiti Španiju, odnosno Vigo koji se nalazi na granici s Portugalom i odslušati ljetni semestar na Univerzitetu u Vigo-u. Tokom svog boravka u ovom španskom gradu imao je jedan solo koncert i četiri nastupa, a pored toga je uspio položiti sve ispite.

Nije krio oduševljenje profesorima koji su mu predavali, te ističe kako mu je velika čast bila učiti od profesorice Margarite Escarpa, pobjednice prestižnog gitarskog takmičenja Guitar Foundation of America, a zatim upoznati i profesora Arabela Moráguesa s Kube,

profesora klavira. Pored profesora koje je upoznao, imao je priliku družiti se i sa studentima-muzičarima sa svih kontinenata što za njega predstavlja još jedno veliko iskustvo s kojim se vraća u svoju domovinu sretan i zadovoljan.

Tokom svih ovih godina Ammar se isticao svojim izvedbama na gitari o kojim god angažmanima se radilo. Ističemo njegove nastupe u sklopu izložbi likovnih radova naših stipendista, Sarajevo Film Festivala, otvaranja Vijećnice, obilježavanja 10 godina postojanja Fondacije Hastor i mnoge druge prilike na kojima je zablistao. Bilo da se radi o fakultetskim obavezama ili onim u sklopu Fondacije Hastor uvijek se rado odaziva i počasti prisutne svojim performansom.

Sadžida Kosovac

Naša stipendistkinja **Berina Baraković** za ovomjesečnu rubriku „Uradi sam“ šalje nam prijedlog ukrašavanja predmeta reljef pastom i akrilnim bojama.

POTREBAN MATERIJAL:

akrilna boja, reljef pasta, lak, šablon, četkica za bojenje, špahtla za nanošenje reljef paste, predmet na kojem radimo.



POSTUPAK IZRADE:




Obojimo drveni predmet željenom akrilnom bojom i pustimo da se osuši.

1.



2.



3.

Osušiti reljef pastu (po želji može se obojiti, na prikazanoj tacni obojeni su samo neki dijelovi reljefa zlatnom konturnom bojom).

Sve dobro osušiti i popraviti ako ima nekih prelaza ispod šablona.

Zalijepimo šablon na mjesto gdje želimo da nam bude oslikan reljef. Špahtlicom nanosimo reljef pastu, ne toliko debelo, tek toliko da se vidi izbočenje.

Lagano odstranimo šablon i odmah ga operemo (šablon se može koristiti više puta ako se pravilno održava).



Prelakirati (može se lakirati i po nekoliko slojeva; recimo, ja uvijek stavljam 3 sloja, radi bolje zaštite predmeta, jer, pored toga što daje sjaj predmetu, on ga štiti).

Dobro osušiti (potrebna su oko 24 sata da se lak u potpunosti osuši).



4.

Pri sušenju može se koristiti fen za kosu. Ako uvidite da su vam akrilne boje i suviše guste, poželjno ih je razrijediti vodom.

Za izradu su potrebna 2 sata.

UČITELJEV KUTAK

Prije nekoliko dana Seid me izvijesti da je krajem maja i početkom juna obišao 109 porodica iz 27 općina i prešao 5900 kilometara da bi se uvjerio u istinitost priložene dokumentacije za dodjelu stipendije Fondacije Hastor. Pohvalih taj njegov trud i upoznah ga da sam i ja po istom zadatku i u isto vrijeme obišao 181 porodicu iz 36 općina i prešao 5200 kilometara. Rekoh mu da su i Amela i Faruk ispunili svoju obavezu: obišli su kandidate iz Ilidže, Hadžića i Sarajeva, njih 43 porodice, i prešli više stotina kilometara. Zaključujemo da je Fondacija Hastor spremna da i ove godine primi novih 333 učenika osnovnih i srednjih škola. Kako Fondacija Hastor povećava broj stipendista, tako se povećava i broj studenata koji pokazuju visoke rezultate na svojim fakultetima. Imamo jako puno studenata koji kao Željko Simeunić iz Čečave pišu: „Do jučer sam položio tri ispita, danas jedan, tako sam očistio ovu godinu!“ Amin Sejfić iz Čapljine kaže: „Položio sam šest ispita i sve su čiste desetke!“



Iz ovih njihovih izjava se vidi da su prihvatili ponašanje Fondacije Hastor da ne govore šta će uraditi, nego da kažu šta su uradili.

Ramo Hastor

Zbog nesebičnog rada, zalaganja i spremnosti da se uvijek stavi na raspolaganje Fondaciji, u ovom broju newslettera izdvajamo ime Vedada Huseinbašića, stipendiste Fondacije Hastor od sedmog razreda osnovne škole, koji je u mjesecu junu odnio titulu stipendiste mjeseca.

Vedad je rođen u, kako kaže, malom, ali lijepom gradu Fojnici, gdje je osnovnu školu završio odličnim uspjehom. Već od tadašnjih mentora na mjesečnom volontiranju Fondacije naučio je puno stvari, od toga kako biti prijatelj i učitelj istovremeno, do toga kako adekvatno uskladiti obaveze s vremenom. Po završenom školovanju, zajedno s roditeljima seli se u Bihać, gdje završava Tursko-bosanski Unsko-sanski koledž, također odličnim uspjehom. Trenutno živi u Sarajevu, gdje kraju privodi prvu godinu Medicinskog fakulteta. Slobodno vrijeme provodi uz knjigu, ali i druženje s odabranim krugom prijatelja, koji se, kako kaže, svakim mjesečnim sastankom studenata-

stipendista Fondacije Hastor itekako povećava. Vedad voli sve vrste sporta, a ponajviše one timskog duha, pa iz tog razloga svakog ljeta odlazi na planinarenje po Bosni. Poslije završenog fakulteta planira ostati u našoj zemlji i na taj način doprinijeti njenom razvoju, što smatra i prvom građanskom dužnošću. Najveću podršku pružaju mu porodica i Fondacija Hastor.

“Što se tiče Fondacije, dovoljno mi je da vidim uspjehe mladih stipendista i znam da je to korak ka boljem sutra. Zaista, ovo je pravi primjer kako se znanjem i trudom može graditi jedna država.” Kroz život i sve teže situacije ide uz jedan moto: “Nikad nemoj potcijeniti snagu lijepe riječi.”

Mi se nadamo da će Vedad nastaviti nizati samo najbolje rezultate i da će se njegovi planovi za budućnost realizovati na najbolji mogući način, te da će postati, prije svega, pravi čovjek, a kasnije i građanin koji obrazovanjem osvaja svijet.

Hanka Mujkić

HUSEINBAŠIĆ VEDAD





VEDAD HUSEINBAŠIĆ



Dobar dan,

ovo pismo pišem kao zahvalnicu Fondaciji Hastor. Ovo je moja prva godina otkako sam član ovakvog kolektiva. Osjetio sam potrebu da napišem ovo pismo s obzirom da ste kao Fondacija bili uz mene ovu školsku godinu. Nastojao sam da opravdam očekivanja, a to ste mogli vidjeti i kroz spisak ocjena koje sam Vam slao. Naravno, stipendija mi je mnogo pomogla.

Također, volontiranje uz mentore i druge stipendiste je na mene ostavilo poseban dojam, jer takav vid volontiranja pospješuje našu socijalizaciju. Što se tiče mojih slobodnih aktivnosti, volim da čitam, igram košarku, stoni tenis, a treniram i odbojku.

Što se tiče mojih školskih aktivnosti, nastojao sam da dam svoj maksimalni doprinos na školskim takmičenjima. Na školskim takmičenjima održanim tokom mjeseca marta osvojio sam prvo mjesto iz Fizike; prvo mjesto iz Matematike; drugo mjesto - Spelling Bee English; treće mjesto na takmičenju iz Hemije.

Što se tiče kantonalnih takmičenja, učestvovao sam na Semifinal takmičenju Spelling Bee. Nastojao sam da budem aktivan i u sportu kroz odbojku tako da sam ove godine učestvovao za juniorsku ekipu OK Ilijaš, te smo uspjeli osvojiti treće mjesto na Federalnom prvenstvu. Ovom prilikom Vam šaljem slike diploma sa školskih takmičenja i medalja s Federalnog prvenstva u odbojci.

Abdul-Vehab Đozić
Srednja medicinska škola, Sarajevo
Ilijaš


FONDACIJA HASTOR

Bulevar Meše Selimovića 16, Sarajevo
033 774 789
033 774 823
fondacija@hastor.ba

REDAKCIJA

Džulisa Otuzbir
Sadžida Kosovac
Hanka Mujkić
Mirza Okić

Maida Husnić
Lejla Đonlagić
Nirvana Žiško